

四庫全書

集部

欽定四庫全書

集部

貞素齋集

卷六至
附錄卷二

詳校官監察御史臣劉湄

中書臣劉源溥覆勘

總校官編修臣王燕緒

校對官中書臣李斯咏

謄錄監生臣胡晉

欽定四庫全書

貞素齋集卷六

古體詩

懷京陵故舊

憶昔族食王謝鄉友朋濟濟相頡頏
烏臺突兀老柏蒼繡衣驄馬諸豸郎
把手夜醉秋天長玉簫明月吹鳳凰
轉頭別我餘十霜歲月流水何茫茫
故人星散各四方

元 舒頔 撰

或居天上旒冕傍或處湖海道自將一隱一顯逢時昌
山林鐘鼎同休光愛親愛國不可忘懷友細讀停雲章

平林烟雨

時人賣畫千金傳一片好景真天然四時不用舒展看
翠嬌綠潤當牕前春三漠漠護暖雨秋九慘慘啼蒼烟
槎牙古怪雲霧暗屈蟠偃蹇蛟龍纏初見疑是李將軍
又似水墨王輞川米家無根與縈腫安得活動金吾天
明朝雨晴烟就斂便欲設榻林間眠請迴谷口俗士駕

幸勿驚我雙胎仙

送彭如山主簿今上皇帝潛邸時如山偕朱克用
隨侍廣西及即位克用除徽泰唐州保甲上副
千戶如山除太平縣尉轉武岡路寧綏簿因訪
克用回賦詩志別

十年天上隨飛龍錦衣出入明光宮一官榮調來江東
鐵面少府神仙風萬乘豈獨嚴陵翁千古氣味將無同
綏寧作簿行匆匆風塵瀕洞途中故人賴有朱元戎

雲霄高誼低穹窿相逢莫計官卑崇至尊豈不思我公
羨公磊落氣如虹五色相期帝袞縫

適耕堂為吳琴汪壽甫扁而賦之

萌坑嶺下吳琴村中有汪氏居其源威烈遺風千載聞
積善好禮枝葉蕃衣冠濟楚信行惇築室亢燥依山根
適耕大篆楣扁存挂經扶耒窮朝昏以適為樂遺子孫
浮雲富貴安足論荒烟衰草金谷園雲關霧谷截來轅
烟蓑雨笠遠市諠肯堂有子班簞塹山川瑞氣藏渾淪

文光五采朝吐吞月明清夜啼黃猿不羨變化南冥鯤
不貪爵祿何負恩春蘭秋菊芬幽軒客至談笑開清尊
任彼輕薄手覆翻退處寧學渠觸藩女及笄嫁男已昏
俯仰無愧乾與坤醉眠老腹摩朝暾至樂百世垂後昆

休寧汪彥材訥翁山房四趣

蘿墩憩松
道羅川聽泉
太和問西

山耕
釣

松蘿有客號訥翁山房書聲夜泠泠堆案經史蟠心胸
吐玉霏屑氣吐虹驚世駭俗無雷同默坐如愚復如聾

參破玄道並真空了達今古靡不通棟梁樸素牕玲瓏
奇花映竹紛青紅方池漾碧春融融魴鯉游泳春喁喁
客來置酒樂意濃忘形取醉肴核豐蘿墩朗詠憩古松
為幢為蓋陰重重太和問道搢短筇道在何處將何從
康莊坦途無不逢川流瀾瀾聲淙淙洗滌煩熱兩耳聰
有時扶來西山東要似鹿門龐德公長竿獨釣鯽與鱮
草塘水長青茸茸消搖散誕穹壤隆有生不億王侯封
有足不踏月光宮兒孫滿眼短鬢蓬嘉禾盈疇菊成叢

山房之樂樂無窮

胡子坑

屬大彰

兩儀未判路不平凹凸突兀潛幽靈毓秀孕奇挺峭拔
攢峰列壑爭伶俜枯槎著蘚半身碧老石迸土千螺青
天淨森鏐列畫戟雲開大彰橫青屏臨深架木側足度
飛瀑洒面洗耳聽已有仙人浴丹室寧無烈士磨厓銘
玄猿不驚籟寂寂白鶴下舞花冥冥便欲臨風蛻凡骨
來茲絕粒餐仙苓尚聞好事難荒穢直上絕頂栽新亭

茗盃先春煮碧澗蓬牕釀醵醜銀瓶素衣何必待三聘
白首尚可窮一經空谷時聞尚書履疎林夜仰處士星
時乖狼虎集妖孽地濶魑魅行真行避世何煩慕清致
憂時且復逃臙腥鄙哉時俗自污濁喜甚濶谷長清冷
祇恐遇公易輕徙玉皇敕命守六丁

汪同甫見賜拄杖

吳王不朝賜以柱九節飛騰異人語葛陂化龍飛上天
入手鏗然亦輕舉圓頂乾象挺正直八卦倒垂靡燥濕

從茲筋力賴扶持
九萬天池六月息
感子慷慨來高情
植立牀頭神鬼驚
祇恐空山沐雨露
策杖老子朝玉京

立秋

西風吹秋七月朔
何曾一葉梧桐落
六合如窑老火作
炎光裂石金流鑠
透衣苦汗揮不却
赤日行天無處泊
山林近時迹難託
祝融酷把朱方鑿
暮收為我清焱約
洗淨熱惱涼如昨
萬里東西縱行脚
風雲變化無拘縛
騎鶴釣天超廣漠

送丘克明歸萊州草鄉

宜春太守推賢良丘東首薦中書堂謀猷或者擬李廣
命運爭奈猶馮唐銓衡俾職五色線相期補衮朝明光
長絲擬繫烏兔足短絲織就龍鳳章彌縫海鶴健帝德
黼黻宇宙開皇綱功成豈料負薪戚陰雨兩月不下牀
遂告太守辭厥職主司猶豫心遑遑今朝西河理歸棹
月明羞澁浮行裝大孤小孤浴秋色廬阜五老含青蒼
揚瀾左蠡鄉國近鄰里載酒仍割羊家山松竹久無恙

留待晚節同幽香
黃山白雲不堪贈
詩成遠送還華鄉
題海寧吳筠軒山水窠手卷

世間名士多愛竹
為愛扶疎伴幽獨
虚心直節傲雪霜
盡日相看看不足
松蘿山下延陵裔
自號筠軒詠淇澳
明牕淨几泚霜毫
暖日晴風弄蒼玉
有時乘興寫山水
復貌時人真面目
一丘一壑胸次奇
萬貌萬形心匠蓄
瀟瀟洒洒聲秋軒
瑟瑟琅琅撼昏屋
我家昔過湘江濱
此君與我情最親
別來廿載世離亂
踪跡萍梗無音塵

適與筠軒偶相見一笑袖拂松蘿昏怡然贈我一幅畫
滄江萬頃波粼粼遠岫雲開虎嘯月疎林霜落鴻來賓
抱琴疑是林和靖谷口又類鄭子真扁舟蕩漾空濶際
蘆華兩岸紛紛續續感子高情寫幽趣世無管鮑行跋跋
明朝漁翁約我度溪曲彷彿又似桃源人

許子仁相招山中叙話

許君邀我來山中我來但見堂戶空主人送客過溪去
風吹兩岸花蒙蒙屋後萬疊金芙蓉紫氣夜吐仙人宮

澗泉流香過白鹿林木挂雨拖青虹羨君築室讀其下
超遙不與世俗通一聲黃鳥破幽夢四顧空牖俱玲瓏
我愛此地無暑氣重來飽飯談仙蹤

陪邑長諸公集燕雲臺

琳宮陪燕集秋暮芙蓉花開色如故郎官騎馬青松林
儒士策筇紅紫路四方玉帛車航來民物次第登春臺
廷臣骨鯁扶日月御史豸聳飛風雷白頭擬獻元和頌
青眼誰識英雄才天風蕭蕭霜欲落卮深酒深同衆樂

桑麻百里藉春溫未信河陽只潘岳

予生之辰留水村風雪中偕戴仲本飲賦此自況
桑弧蓬矢負初志竹泉勲業期晚年擾擾無情萬觸目
蕭蕭短鬢雙垂肩文章慙儕司馬氏清致合友林逋仙
貴重何須六國印富餘只用二頃田種花蒔竹酌芳醕
打馬圍碁和長篇底事今年醉親友亂離重會非偶然

寄葉郭二郡守十六韻

番江千石皎玉樹嚴瀨五馬拳蒼顏武士鎮邊衆或忌

文臣制節民具瞻侯藩布令謹出內相府馳譽無涼炎
奮迅鶚書昔並薦飛騰驥足時暫淹呼童朝耕引暮汝
攜子夜讀分秋蟾富貴逼人波波功名到手猶謙謙
江陵委付詭譏佞將收予決存公庶水驛七千速旌旆
官船一月諳薺鹽曠懷遠寄漢江曲雅調清絕廬山尖
晚泊九江駭雪浪寒生五老懸冰簾回頭大小姑遠望
舉手東西梁可拈寂寞蛾眉卧采石淒涼蓬鬢啼青帝
山中猿鶴未必怨天上雨露何當霑幾欲作詩慰行館

二公發笑時巡簷行藏勿與大官道窮達安用太史占

却憶徘徊泮池上輕衫短帽春風嚴

大小姑在江州下
東西梁在大信時

酒禁

甚嚴

詠高景樓

蜀川陳氏

蜀山宕巍蜀水長中有偉士鬚眉蒼築樓百尺聳奇觀
追昔豪氣相頡頏頑眼空林麓隘宇宙手扶雲漢分天章
仰觀衆星何歷歷下視濁世何茫茫畫棟朱簾香掩霽
丹霞翠壁森相忘我來著脚試登眺主人置酒仍剖羊

琉璃盤凝玉酥滑瑪瑙杯泛金液香是時天氣頗蒸溽
木末風颯生微涼楣間大扁高景字墨汁光潤如瑤璋
高山景行有深意暇日對此宜端詳心融理會與道一
境界萬物皆春陽心自心分理自理富貴過眼雲飛揚
醉酣擲筆霹靂響共子一笑歌時康

長短句

懷京口

我昔遊北固飄飄紫霞裾手招雲中君嘯傲驚天衢一

別回塵寰於今五載餘緬懷城中朱紫客朝臺暮省相
催迫東華駟使傳宣來喜動諸公藹春色偶遭禍亂居
山中衣冠面目塵土蒙儒坑選冷難得調兀兀且作經
年窮不知故人念我否詩成遠寄南飛鴻

對雪

晚來陣陣風作威不知青山添却幾尺圍但見竹枝如
盤折上天下天仍復片片飛出門如此凍何人攜酒送
烟村八九家未若自開甕乘興泛舟頗自竒人生但貴

心相知牡丹開時已預報誰知愁遇藍關道羊羔太俗
茶太清我奇我詩君細評

陪知縣理天章遊石照

度東溪上東嶺亂石絆健足修羅拂衣領曲蹊窄徑勞
攀躋上如升天下入井霜風嚴肅寒景寒冰照壑映林
影一彎一抱山盤紆萬壑萬松聲盡涓知縣來閱清境
山花含笑山勾引青銅出匣懸空崖照我鬚眉光炯炯
不知誰鑿復誰磨肝胆私耶豈容隱山僧來進紫霞杯

一聲長嘯山雲開百年塵世幾更變臺殿突兀今却灰
世幻物幻我亦幻英雄豪傑何為哉二三老類四皓就
中可惜無才調扶王抑霸今何人老天想已安排了歸
去路我已悟半醒半醉日將暮青天萬里淨無雲鶴鶴
橫空叫烟霧

同弟仲修訪胡亨甫病中

拂開紅塵路直上青雲闕手弄碧芙蓉倒騎白采鸞飄
飄乘風遠相訪萬里無雲春韶蕩笑問久病老維摩肯

教獨占梅花帳隻雞斗酒情何懽咫尺如隔弱水寬祝
君但願塵加餐春山處處堪盤桓

七姑峰

大姑雲髻青披膚小姑霧鬢青模糊三姑窈窕新沐梳
不知山靈許嫁無娉娉侍側第四姑五姑六姑醉欲扶
惟有七姑低小隱復見疑是當年化石望厥夫風拭雨
磨幾千載挺立天地面目巖山頂日日望霧暗山腰年
年草不枯精靈魍魎時出沒下有猿猱掛樹長號呼大

卷六
椿老桂枝扶踈石室照夜丹砂爐乘鸞跨鶴來往環珮
響彷彿蓬瀛閭苑仙人之清都佳致便合寫作圖時乎
時乎歸來乎

送革鄉丘克明

楊柳磯燕子飛江南倦客江東歸蘆芽出水鯁魚肥君
亦歸去是耶非聞君疾未相識漫浪贈言恐無益新豐
斗酒何日逢人生意氣無南北喜津津去宜春鶯花滿
路娛歸人君不見都門冠蓋都憂惱拄杖故園風日好

寄王和夫效騷體

我思美人兮山之北一別悵望今年逾六七世事紛擾
兮不得息朔風慘慘兮橫戈飛戟睇寒雲今日將夕隔
遙岑兮隔我話疇昔仰天長嘆兮空相憶

我思美人兮山之陰來便郵兮寄佳音錦箋雲字兮長
短吟升沉榮悴兮君知我心路迢迢兮白雲深思夫君
兮憂心悵悵何時握手兮因盍簪

過伏牛嶺

伏牛嶺高高且遠崎嶇羊腸路百轉仲冬跋涉汗流漿
每數時危歷艱險陰厓慘慘生悲風極目四顧山巖從
人生能着幾兩屐踪跡不異無根蓬我家居山南別業
寄山北羣兇勢縱橫往返苦行役山中天氣溫如春絕
壁遙見梅花新梅華年年見春色不見多少行路人

玉虛中道士見惠紫竹杖詩以答之

仙翁遺我紫膚筇九節入手生霜風霜枝露葉脫凡庸
長身恐出嶰谷中七尺炯照蒲柳容苔班荊棘交戶封

精神氣骨元化通扶策已喜慰老翁顏色無復驚疎慵
拄訪王母瑤池東桃華千樹如錦紅金童玉女雲間逢
倒拖笑入蓬萊宮留向牀頭祇恐蚤晚化作龍飛上天
去開九重扶重瞳

貞素齋集卷六

欽定四庫全書

貞素齋集卷七

元 舒頔 撰

五言絕句

春日雜言

日暖苔衣軟，谿行荇帶長。
化工無限意，袖手立斜陽。

二

梅片點蒼蘚，松花糝翠厓。
年年春自好，奈此世情乖。

三

賈誼思明主
華元歸故都
張良辭北闕
范蠡泛東湖

四

湖海半生客
乾坤一布衣
義哉周伯叔
飽食首陽薇

題墨菊

寂寞東籬下
花開幾度秋
相看有佳趣
歲晚共綢繆

度輦嶺

岑頭雲霧暗
不見崎嶇路
寄語來去人
黃昏慎行露

二

樹隱猿猱形雪印虎狼迹天寒日苦短閉戶莫出入

夢遊三絕

霜月炯虛寂雲霞燦縹緲玉府朝真回鞭鸞過蓬島

二

天壇吹玉笙洞府騎白鶴綠鬢雙仙娥乘風下寥廓

三

琤琤白玉珮燦燦紫雲裘海上幾千里雲間十二樓

翠眉

西嶺橫翠眉讀書舍其下諦觀無聲詩寫我有聲畫

閔堂菴

山川藏勝地竹樹隱孤菴泉列出龍窟燈清明佛龕

五言律詩

甲寅正月二日雪

元日喜開霽晚來雲翳生園林春淡淡天地雪盈盈寒
色砭肌骨晴光待燕鶯繁華何處是人在鳳凰城

野興

日落山逾碧霞明水透紅
物華離亂際人事寂寥中
園棗經時熟田禾失歲豐
悲哉秋漸老天濶叫征鴻

宿田家

茅屋編疎葦童奴卧與俱
僧來尨吠竇人靜雀行厨
未擬揚雄宅難招葉令鳬
霜風正高潔有酒且須斟

過洪富嶺

野鳥聲如鬼溪藤曲似蛇
升高愁步履歷險怯欹天

近身疑蛻雲飛手可拏振衣千仞頂蒼翠渺無涯

次夏守謙遊石照韻

空厓隱光怪一片倚林阿石古元非鑿奩開底用磨月
寒光欲吐露曉色逾多山鬼形難遁騷人費咏歌

次俞舜欽寫懷

花落隨流水枝空掛女蘿位卑心獨赤世亂鬢先皤
處賓朋少康衢狐兔多邊庭威武備數誦大風歌

九月晦日宿清福寺

即清塘寺

一徑通幽寂脩廊碧霧融
禪僧坐默默山鳥語空空
花竹蕭疎際林泉鳴咽中
日高人未起紅葉下秋風

七夕

佳節秋無幾歡娛在此宵
雲間兔搗藥天上鵲成橋
巧處從人乞拙來還我招
兒童覓瓜果踏月慰無聊

幽事

麤麤垂鬢白惟怕事縈心
汎海憂無計栖山恨不深
早梅將破玉衰柳又含金
造化無停轍幽懷那可禁

除夕

茅茨雖偏側兄弟喜團欒
酒灑玻璃殘魚蒸翡翠盤
百年從落魄再拜乞平安
門外霏微雪頗饒今夕寒

除夜寓飲雲臺觀微雨

天壇淨寒雨殘歲夕已除
燈火澹城市寥寥類村墟
民人各離散何日寧此居
抱恨待明旦欲獻軍前書

病退

清閒無病惱即是老神仙
臨水簪花飲開牕枕月眠
坐

吟松下石涓飲澗中泉此樂無人解玉簫吹洞天

人日晴

元日至人日今年却喜晴四方民樂業千里卒休兵春
麗山河壯風清草木榮老天賜強健拭目看昇平

雨中適興

天濶雲橫野春深水遶村折花攢粉蝶投果喚青猿潤
物絲絲雨傷春片片雲時危朋友少終日掩衡門

山莊雪霽

山莊倍岑寂沽酒出前村聲怪風號樹光清雪擁門莊
嚴天地老約束虎狼蹲偶遇負苓者前知與細論

聞鐘嶺

春雨聞鐘嶺亂山啼杜鵑因思離亂日復見太平年步
月栖巖穴凌霜度嶺巔古松曾識我深省復潸然

績溪嶺

縣以績溪治嶺何占此名四時聞澗語終日少人行有
石虎豹臥無巢鳥雀爭淒然情思淡倚杖聽松聲

無題

身歷兩朝日眼空七十年文章難並世貧富總由天學
草夸張旭能詩說鄭虔老夫渾不解醉後祇貪眠

郊行

人老詩難老人窮道不窮宦情流水外野興久陽中窻
泊千峯翠簷飛一葉紅夢中加帝腹千古有誰同

題方仲章莊居

松竹覆苔徑開牕對翠屏林花紅窈窕瀑布玉傳伶俚

卓抱高甕常林挂舊經山莊有清意大藥養脩齡

幽居

自愛幽居好門無俗子來朝廷常選士巖穴有遺材
垂柳拂蓬戶飛花點砌苔棲遲林壑態補報乏涓埃

二

自愛幽居好簞瓢陋巷如時評王霸業日讀聖賢書
數竹驚棲鳥敲針學釣魚酒爐並藥灶鎮日伴茅廬

三

自愛幽居好，衡門鳥雀馴。
筆牀香帶墨，書几翠分筠。
詩禮家聲舊，兒孫學業堙。
論文求益友，斗酒聚比隣。

四

自愛幽居好，園池物物新。
碧桃飛粉翅，翠藻穿金鱗。
久謝江湖友，長懷翰苑人。
德星何處聚，昨夜夢荀陳。

遣懷

母老能強飲，兒慵不讀書。
生逢離亂世，遷傍隱幽居。
野水通荒徑，松林接遠墟。
尋梅蹋雙屐，適興雪晴初。

歸來

潛迹鄆山側歸來六月初耕園
逢種豆斲地旋栽蔬世迫詩書
廢心憂禮義疎臨風三歎息倚
樹獨躊躇

角鷹

頂毛森獨角喂肉常恐餒觜爪
思攫拏羽毛耀文采一飛冲九霄
兩目窺四海志非燕雀知微物焉
足悅

避俗

閉門避塵俗悶來還杖藜微風
時動竹久雨不衝堤林

濕朝生靄山明晚挂霓可憐龐老子耕耨共山妻

山中居

自得山中趣晨炊採藥苗養真期骨蛻息氣御神飈花
襯玉喬爲衆香許子瓢已疎城市迹安用小山招

二

世事且如此何煩苦用心罕逢青眼客細誦白頭吟川
上波常逝山中雲更深製荷仍佩蕙不受一塵侵

坐石

趺坐蒼苔石斜披白接離行人隨處說羣盜出村遲避
地山嫌淺憂時事怕知近來難粒食枵腹且吟詩

來鴈

嗷嗷起沙漠肅肅度瀟湘到處隨寒暑謀身豈稻粱不
鳴常得罪傳信又何傷明月蘆花夜歸來兩翅霜

雨窻雜詠

萬里雲烟暗一天風雨愁無書上北闕有雁過南樓禮
簡陳蕃榻寒荒李子裘名聲江漢濶何日放吾舟

二

依山開竹戶負郭葺茅齋每嘆時難得何愁事未諧
追隨詩作侶消遣酒為懷陋巷貧而樂憐渠死便埋

新竹

當牕色清潤入戶影扶疎直節臨風瘦新梢過雨虛
密留棲采鳳長取釣鰲魚若欲逃塵俗且看君子居

天河

迢迢亘南北不見起風波明月紫微近氣吞滄海多星

辰不敢度雲霧有時過便欲乘槎去高深知幾何

對雨

挈家避山下濕氣襲衣襟絕壑風雲壯空林烟霧深人
驚時洶洶猿叫夜沉沉未見歸寧日懷憂隨處吟

過旌德

寂寞旌川道川雲暝不收張騫西域使范蠡五湖舟豆
子雨開霽嶺花風弄秋驅馳王事迫今日莫淹留

生辰

行年五十五於世慚無補勢離鴛鴦班意豈鷄鶩伍脚
跟摩層霄心力窮萬古是身寄乾坤夢寐憶鄒魯

獨步

獨步誰為侶溪邊有白雲情親鷗共狎機動鹿分羣細
草沿厓出幽花隔岸馨歸鴉背秋色飛過夕陽林

度輦嶺

下嶺日已暝四山烟霧深世情不爽意家事頗關心今
夜月生暈明朝天恐陰人家虎狼懼列炬出疎林

山家

涼風吹積雨，獨樹對山家。
村落孤流漫，兵戈老屋斜。
牛羊歸晚路，場圃見秋花。
萬寶告成日，蕭條良可嗟。

花朝雨

細細花朝雨，問花何日開。
尋芳幽徑去，拾翠曲堤回。
屐齒沾香草，籬根臥落梅。
因思去年事，愁苦遁山隈。

答高復九秀才

斯文寓宇宙，無古亦無今。
在我樂聞道，從渠乏賞音。

戈常沟湧禮樂未銷沉
賴子時來過庭花轉干陰

過西坑次劉昭父通判壁間韻

我來河陽若無復見斯人
霧罩松間石雨沾頭上巾
感時空說劍憫世罕埋輪
一笑出門去葉間啼鳥頻

次方彥默雨中韻

故園無限好春雨長蒿萊
冠蓋底須羨詩書良可哀
百年難自料兩鬢苦相催
寂寞山林下無由去上臺

小園

瓜已抽長蔓槐將試早花人忙時雨稼邊急暮雲笳白
莧生紅葉黃葱長翠芽小園生意足盤飣不須賒

平原

眺遊縱遠目平原試一登村村來俗物寺寺長蠻僧跨
澗長松樹懸崖老葛藤崎嶇山下路來往記曾經

上莊山家

萬疊山如畫高岡結數椽種茶依白石接竹引清泉住
久民風樸身潛世俗牽時乖易觸諱默坐意悠然

次俞舜欽韻

雲氣騰三島春光隘九天
低枝花雨泣夾岸柳風顛
吟苦幾成癖看來自可憐
脫巾松下卧高詠白雲篇

二

閉門春又暮遊子去何之
世事忽顛倒人心太險危
從教狼虎鬧莫遣燕鶯知
古誼今誰尚蕭條歌戾戾

三

觀水非云釣登山豈為樵
日邊書欲至雲外隱難招
問

姓題蕉葉尋幽採藥苗
商山雖可樂恐負聖明朝

四

山中春欲暮春服未曾成
細細巖花落茸茸
牕草生
遲悲世事牽落嘆人情
微祿慚無補終身荷聖恩

寫懷

羈縻隨世俗陶寫任天真
夜雨似留客春寒偏着人
消磨三尺劍抖擻一襟塵
幽憤終難遏行歌江水濱

雨窻遣興

靄靄林間雨涓涓石上泉水從幽澗出河與大江連雲
重鳥無語天寒花未然悠然清興在何用更逃禪

二

淪落桑榆景蕭條向草堂時情宜澹泊詩思或茫洋天
上冥鴻遠臺端采鳳翔慚無五色線為補袞衣裳

山居

次寧川汪子亨氏
伯父武卿憲使韻

我慕山居僻幽深好避時解愁澆濁酒消困釣清池欲
作竹君說恐令梅友知興亡百年事翻覆幾枰棋

二

我慕山居客知時悟昨非
饑餐藜藿飯行著芰荷衣
未雪梅先瘦經霜芋自肥
幽居真有趣祇恐未忘機

三

我慕山居友閒中意思長
秋風籬下菊春雨屋頭霜
煉藥類引景逃名效子房
紛紛朱紫貴朝夕任渠忙

風雨瀟瀟微醉秉燭復賦

阻却登高興泥深懶出門
免教穿螭屐聊復倒菴籬

菊枝底壓山雲氣自昏誰云秋圃澹老子惱吟魂

二

緬想陶彭澤斯人未必貧偶然無酒飲尚爾看花頻江
海雲垂地川源水拍津杯盤雖澹泊吟咏莫因循

上田

登眺有餘意豁然心目間過橋梅蘸水傍屋竹連山隔
嶺間雲度投林倦鳥還從來丘壑意頗與幼輿關

春雨

霖霖回枯意霏微潤物初翠眉催岸柳紅甲長畦蔬泉
動溪流活春浮土脉虛生生功用博何物為吹噓

雨後

寒雨滴深夜寒衣未著綿百年心事在萬種俗情牽野
潤雲垂地江空浪泊天揚州城下路來往憶當年

山居

走筇雲出岫開院鼎沉烟惆悵人千里涵容自一天懶
從丹井問醉傍白雲眠久悟浮生幻歸耕隴上田

二

披襟坐林下
清露滴衣裳
饑采松花服
行穿榭葉香
利名心共遠
山水意何長
休引時人訪
恐驚雙鶴翔

病後

老矣筋骸弱
病餘脾胃衰
已無裨世術
更久入時詩
舊水歸新港
殘花戀故枝
同眠不同夢
此意老天知

出邑書所見

時居山莊

路路迷荆棘
田田沒草萊
佇看心已慘
更覺眼難開
運

蹇青雲隔時危白髮催縣官移檄至珍重再三來

司諫黃克敬尊翁申甫獲榮封克敬便歸稱觴膝
下詩以慶之

真龍飛甸服三鳳起河東忠孝源流遠兒孫際遇同錦
衣來膝下丹詔出雲中白髮如君少痴兒愧老儂

索畫

西江好山水畫者至今傳高古關潼氏清奇羅稚川流
水疏林外夕陽芳草邊何時茅屋底松樹起雲烟

日薄

日薄霜華重天寒雲氣低市廛烏復集關塞馬頻嘶請
老聞風退嬌兒背父啼休論當世事我已醉如泥

述懷

暮年不再春歎歲且安平脫齒愁堅物眼昏猜遠人趨
廬嗟却薊戎馬喜歸秦白髮江東客無心謁紫宸

山居次二弟韻

南山爛白石東谷產青芝顛倒萬般事翻騰幾局棋鳶

飛天澹澹魚戲水漪漪又赴東華燕旗翻王母池

二

消搖物外人衣上怕緇塵商嶺猶辭漢天台尚避秦隔
花紅雨亂泊柳翠風頻午谷烟霞迴相過問子真

村口晚眺

暮烟橫遠隸宿靄卷疎林豁達乾坤眼消磨湖海心引
杯成略醉得句且微吟晚景多佳趣誰能意外尋

山莊雜詠

繞屋陰陰樹通池細細流寄書來故舊飛夢上神州百
兩歸朝士千金買墜樓知幾誰氏子一笑過林丘

春雪

片片沾芳草紛紛雜落花籬寒春雀陣簷凍午蜂衙雲
密深藏樹溪渾不見沙小牕風力惡呼婢莫烹茶

日暮

日暮睇寥廓天空雲自閒四圍都是竹三面更無山春
盡花纔放林昏鳥獨還故園桃李夜此意頗相關

晴

雲氣扶紅日江光漾翠濤烟籠淮樹遠天淨楚山高慕
道心誠渴憂時鬢獨搔明朝鍾阜去渡口買輕舸

白土嶺

拾松供煮茗掃石坐談詩湖水連天遠山雲雜霧遲川
原森壯麗宮闕鬱參差日夕下山去姮娥淡掃眉

二

野水孤城迴風行浪積沙一方龍虎國六代帝王家玉

樹歌仍在新亭恨轉加凝情正寥落漁唱答邊笳

茅岡鋪阻雨

巖谷幽棲士江湖懶散身思鄉荆楚客憂國杜陵人
年
老常防病時乖不厭貧滔滔浸北陸何處是通津

過靈鷲次少陵龍門寺韻

以茲放曠身間適清靜境殘雪生夕光老蟬弄寒影但
知泉石幽不覺毛骨冷老矣時一鳴勗哉日三省

晚興

枕簟涼如水飛蚊晚不禁空懸三寸舌難訴百年心
鷗狎機先息狐疑計愈深臥聽黃鳥弄醉和白頭吟

程氏幽居次唐仲實韻

自得山中樂田園近屋廬池清魚可釣林密鳥相呼
剪燭窻前讀敲門月下沽鍾陵多貴氣此意有還無

二

青山秀可掬似與主翁便釀秫為留客採芝常遇仙
花香雲滿洞鶴唳月流天願棄人間事同盟海上緣

嶠源

溪回石欲動山斷路還通
嵌石蘚花白颭林楓葉紅
野雞啄寒澗塞鴈下晴空
莫怪楊朱泣於今路更窮

責子

有子如無子承家恐墜家
白頭憂憤積綵服婉愉賒
孝養天應庇公勤衆所夸
丁寧猶不省貧困莫咨嗟

題方行可教授講堂

時制世業儒得編儒戶
吾績以儒為戶者凡若干而

行可氏世為諸儒所宗因作講堂以會講焉故咏之
隱隱松林下瀟然屋數椽五星光滿座六籍煥中天道
脉來西浙心傳會百川圖書家學在行可本周姓故云然講論自
便便

清明祭祖墓便過旌德栢齋宗家兼懷點歛祁諸
宗人

水木尋源本宗情自一般春風助酬酢夜話儘盤桓
歛時親近旌祁路渺漫韋家花樹會幸勿作虛談

二孫何孫勤兄弟馳名人呼為大小狀元先世雄雅二公以雄才及第故云

杜陵清騎出騎馬覓從孫埽墓空增感懷宗亦斷魂二
孫名更遠諸阮譜猶存獨喜儒冠繼寒飈漫自溫

五言長律

寄工部主事許由衷十五韻

杜老登先籍韓公踵後塵古來清要地多是讀書人
才德真堪羨天姿稟賦醇論思勞主畫獻納善敷陳
乳水懷潘岳潁川思寇恂歸朝班鷺羽入奏近龍鱗
臺閣名

聲著風雲事業新
宮庭扶日月陵寢護松筠
萬國車書混三軍
甲冑巡皇猷期黜散
洪業擬經綸冠冕崇清廟
車輿擁紫宸近聞搜讖禍
無怪受誅殛汲黯誠匡主
顏公不顧身崇思千古召
翰寄五雲郇遺愛銘諸子
謳歌藹四民

贈元善蔡君理官銅陵

白面皇華客朱衣紫府仙
儀容過雅典進退合周旋
奉檄長臨闕宣威每到邊
風塵雙鬢底江漢一帆前
上相

推多藝諸公念獨賢
銅陵開舊治玉案受新遷
拜命兼恩寵躬行在
勉旃好攀潘岳駕莫後
祖生鞭
敝橐無他送將詩自我
先永期懷補報常為抑
雕鐫旦日催鳴珮
春風簇小筵從來荆棘
地鸞鳳豈留連

七言絕句

過石金

東風著意扇微和紅白
花開亞薜蘿
榮辱不關心已遠閒
看童稚拾溪螺

瀑布泉

雨餘嵐翠撲吟懷
秀巘奇峰似筍排
帝謫玉龍飛不去
怒泉百尺噴蒼厓

題石鏡

非琢非磨亦非鑄
陰精凝秀揭光明
熒熒長照巖阿底
不照人間事不平

二

混沌初分鍾秀氣
山靈呵護到如今
寒光閃閃窺今古

照破姦貪詭佞心

次朱克用萬戶韻

和風駘蕩柳腰斜
茅屋溪邊賣酒家
馬首翩翩旗脚轉
如何偏惹帽簷華

采石

江聲似欲欺文士
月色曾經照錦袍
八百仙人騎白鶴
紫簫吹徹碧雲高

九日無酒

龍山會上不曾飲栗里門前無處賒望斷白衣人不至
教人羞煞見黃花

維揚七詠

明月樓

昔年明月照盈盈今日樓空月自明銀甲錦箏歌舞地
寒鴉落日淡孤城

皆春樓

樓前景物逐時新樓上笙歌日日春華麗已隨時節換

東風吹恨柳眉顰

騎鶴樓

遼海胎禽去不歸
人民城郭是耶非
腰纏休作揚州客
設使相逢起禍機

嘉會樓

壯年登覽醉歌日
況是太平全盛時
燕子銜將春色去
畫欄寬處樹旌旗

平山堂

平山山上構高堂堂下青蕪接大荒堂廢山空人不見
冷雲秋草臥橫岡

蕃釐觀

即瓊花觀

天上奇花玉色浮祇留一種在揚州如今后土無根蒂
蜂蜨紛紛各自愁

太平橋

青樓翠幕舞纖腰金屋銀屏貯阿嬌二十年前豪俠客
相逢猶自說前朝

雷塘

隋場帝所葬之地

帝德當思萬世圖
牙檣錦纜下江都
盤遊未竟天兵到
占得雷塘地一區

鼓樓岡

殷殷雷聲雨未收
鼓樓岡上滑如油
昔年禾黍離離地
誰把蓬萊換却秋

青山之旁曰眉山
喬木儼如昔時因
其事而賦之
稻滿圩田水滿陂
石橋松徑槿花籬
雞鳴犬吠日將夕

金史卷之八
卷七
一帶人家似舊時

金陵懷古

龍蟠虎踞石頭城
今古英雄幾戰爭
遺恨六朝何處是
江聲猶抱不平鳴

太白墓

唐翰林李太白之墓
郡守馮景夫篆書

太白墳前秋草黃
葦蘆高捲紫藤長
文章從古不傳後
笑煞沉香賤夜郎

生孫

吾年五十始生孫天相儒家積德門但願賢材為世用
何妨錯節與盤根

二

無難無灾便可嘉公卿由命不須誇他年月窟相期汝
莫忘龍山安定家

四皓圖

局面何曾肯放閒看來著著是機關當時汨沒知何限
幸爾圍棋不出山

白葵

好似巫山窈窕娘
冰肌玉骨雪為裳
自從月下輕離別
幾度薰風欲斷腸

石竹為胡伯善題

一枝洒洒出風塵
婀娜高標足可人
莫近葛陂風浪濶
怕渠變化起蒼鱗

二

西臺石刻王摩詰南土墨妙文湖州後來好事多彷彿

不道斯人一出頭

三

一竿兩竿晚颼颼拄杖敲門六月秋為愛此君貞節在
何人更向渭川謀

四

為愛山陰王子猷幾回停棹越溪頭萬竿碧玉森如洗
聊寫一枝風滿秋

五

酷暑人間不受降根移直節自湘江長梢結實留栖鳳
先借清陰拂短牕

病中問內弟戴仲本

我病雖遲病已多不知仲本近如何少年詩酒磨風月
老去焉知疾病磨

二

此日功名願已疎溪山隨處樂樵漁如何二老同時病
彼此相遺問起居

題蔣本仁巢木竹石

瀟洒疎篁曾雨露
槎牙古木慣風霜
東風不管忠貞節
羞與當時作棟梁

題石照蘭若

無名無利亦無能
我是人間有髮僧
靜坐冥思愛幽寂
何須向我說掀騰

二

白雲深處一間茅
門對長松老鶴巢
客至煮茶延淡話

任他虎豹自咆哮

題水墨葡萄

老龍騰淵雲氣濕萬斛驪珠夜光泣秋風吹滿西涼州
釀就清香浮玉腋

翬嶺

吼吼肩輿石徑斜亂山高下暮雲遮南風吹散九天雨
西嶠開殘百合花

由績坑出乳溪聞鵲

細草幽花二月天
暖風晴日弄春妍
孤村路僻行人少
忽聽深林叫杜鵑

二

雲樹蒼蒼鷓鴣亂啼
炊烟澹澹日沉西
尋幽獨向山中路
吟得詩成何處題

送楊子威巡檢

傳家清白負通才
高築黃金孰與媒
騎馬莫辭龍虎國
題詩須上鳳凰臺

過西坑次劉昭父壁間韻

兵後公庭又一新眼前物物見天真
青山不管興亡事幽鳥數聲啼破春

獨感

翻雲覆雨須臾間轉喉觸諱生波瀾
淳風已散不可復九疑翠冷湘江乾

暮春

黃鳥穿花語自柔清風吹竹綠修修
道人懶散江湖客

不道於今遽白頭

偶成

燕子穿花帶雨飛
杜鵑聲苦勸人歸
靜觀世事何時了
小吏敲門逼戰衣

閒居

齋前一樹瑞香桃
綠葉蓁蓁僅尺高
待渠紅熟邀王母
祇恐東方暗裏招

二

涼雨初收放晚晴尋詩池上句難成槐陰布地鶯聲滑
山上白雲無限情

題清湘秋景

昔人云詩是有聲畫畫是無聲詩善模寫詩與畫者
之辭然一丘一壑出自肺腑肆於筆端不自知其神
也矧瀟瀟洒洒奇奇怪怪非深得意趣之妙不可及
友人汪允中以清湘圖寄示予觀滄江白石茂林脩
竹彷彿昔客湘中時景江許小艇坐紫衣橫玉簫鳴

鳴怨訴又不知誰氏子豈意離亂後覩此佳致有聲
二首敬書以歸

木落三湘雨後天細泉飛瀑掛晴川疎篁影裏簫聲過
借問誰家上水船

又六言

日暮九疑矗矗清湘萬竹修修不管掀天風浪孤鸞引
鳳船頭

偶題

生平不識大鄆山，歷井捫參四十彎。
誰道仙家隔蓬島，桃花流出在人間。

過程氏莊

昨夜東風吹柳條，石痕橋上玩梅梢。
百年蓄積隨流水，新燕還知定舊巢。

周村

一溪流水碧潺潺，萬壑松風舞翠鸞。
老客石盆巖下憩，興來題字付誰看。

書西坑楊子威巡檢官舍

詰曲溪山窄復斜
溪流淺碧漾寒沙
山村亂後蕭條甚
隱約疎林一兩家

小陳村題竹

數竿修竹翠交加
一曲清溪浸白沙
喚雨錦鳩林木外
晚烟飛起那人家

二

霜林慘慘帶蒼烟
擺綰連雲慶有年
回首峴山烟路隔

金少巳ノ
二
莫教羊子淚潸然

題田家壁

屋上青山屋下池
松杉蓊鬱映清漪
兒孫耕種歸來晚
臥聽流鶯啼竹枝

二

料得時光不是秦
野花啼鳥又青春
行人相見莫相問
曾是當年避寇人

百古

漠漠輕雲淡淡陰
門前楊柳萬黃金
誰教巧語調春色
飛向高枝學百禽

出山中

下山容易上山難
上到山頭足力酸
待得易時難已歷
常將容易轉頭看

二

偶隨流水到天台
無數桃花夾岸開
箇裏本非人世界
如今悔煞出山來

出汪家村

轟雷將雨驚孤枕急電搖光閃暗牕風勢不須如此急
生平肝膽未甘降

二

四簷如注雨垂垂頃刻山河盡蔽虧皎日中天行白晝
縱然昏暗不多時

雪

乾坤清氣屬陶家太尉元來不煮茶老子無茶亦無酒

拄藤踏雪看梅花

題汪良后唐馬圖

桃花亂落春不收
片片飛上紫驊騮
見說天閑求駿骨
莫將顏色為君謀

張氏耕隱堂復次韻以足其卷

獨向南莊臥白雲
遠山點點入簾青
半犁新雨孤村外
始聽春禽第一聲

暮春之夕雷雨交作

金瓶梅詞話卷七
一聲雷震天關動半夜雨欺茅屋踈推枕披衣忙檢點
牀頭惟恐濕詩書

次俞舜欽述懷

化行俗美說吾鄉鳳不來兮走虎狼棋局翻騰何日了
未聞諸葛起南陽

度新岑晴日可喜俄而復雨

汗漬羅衣春晝長山茶花謝水流香東園紅紫無多了
說與蜂兒莫恁狂

高郵破

海水歸洋不上來江湖到岸又空回
白衣蒼狗隨時變日莫空聞猿嘯哀

至泰州書徐千戶壁

海天無際接扶桑此地曾經幾戰場
怨恨不隨流水去空階夜雨泣寒螢

二

圖書整整堆蓬華劍戟森森擁柳營
留客茶瓜話平昔

隨緣擺點泰州城

送人之濠梁

萍梗無根任所之
休將身世計安危
槿花滿地紅於錦
怪煞狂風昨夜吹

風雨墨竹

一枝瀟洒暮颼颼
散作江南六月秋
休棄散才看弈化
葛陂深處是龍湫

贄書李廷獻

書生亦是避世人江海何日寧風塵孫吳不生伏波死
山谷且復潛閒身

小谷菴

白晝不聞雞犬聲黃昏畏避虎狼行時光即漸消磨盡
為問玄通作麼生

過魯子昭山人

竹樹深幽三兩家瓜蔬場外種綿花平田趵水耕鋤辦
醉倚柴門看落霞

七言律詩

至正十五年乙未歲元日居山中

霽雪收寒放曉晴遙瞻北極慶長生
杯浮淡柏茅柴酒盃入酸齏骨董羹
白髮隨時居古里丹梯何日上神京
新正戊午好天色人與梅花一樣清

燈花

焚膏為燄草為根縈上光搖夜氣存
金粟何曾嫌陋室銀缸長是照閒門
幾番報喜期盟約數伴傷春搵淚痕

暗倩佳人纖手剔榮枯不藉化工恩

自嘆

半紙虛名屢失機六年憔悴北山薇
雲霄路近行囊澁湖海塵揚故舊稀
官冷位卑思補報祿高責重慕輕肥
閉門風雨春多少鴻鴈雖離又北歸

清明

空濛細雨濕松楸亂後人家哭未休
幾處燒錢飛蛺蝶三叉無主祭骷髏
精魂作祟狂魂語新鬼銜冤舊鬼愁

可是禁烟兵燹際荒城寥落水東流

送春

蒼龍御駕送東君閃閃旌旗暗別魂花謝水流孤白日
鶯啼燕語又黃昏光風雖好客顏老世事難齊歲月奔
見說祝融交代了空教殘綠對芳樽

詠石鏡

屹立空山照不平鬚眉一見更分明神呵鬼護光尤炯
雨洗風磨色愈清淨瑩無瑕秋鶴妬虛涵洞徹曉猿驚

騷人逸士多遊玩說與山僧為啟局

過小谷村程履善留酌

松風出谷響颼颼滿地松花夜不收危路駕橋連石磴
高田接視引溪流空開林麓天光近汗濕衣衫暑氣浮
芒屨竹枝今倦矣故人雞黍為遲留

秋蟬

老樹西風黃葉飛栖枝泣露晚涼微短長吟處雨初歇
斷續聲中秋又歸化去尚留遺蛻在看來誰悟幻形非

澹烟衰草郵亭路多少行人愁夕暉

胡仲敏訪予石門

敲門風竹報平安知有何人為解環
歲冉冉兮如撚指
事紛紛處且開顏
醉酣山水清幽際
思入雲烟慘澹間
聞說淮南狼虎鬪
關關山征戍幾時還

正月八日上母壽同表弟戴仲仁飲於山莊

穀日清明春漸長
白頭慈母壽而康
延儒未見開東閣
稱壽何妨燕北堂
住世久經離亂惱
慰情還喜子孫昌

希年希有今逾五笑著斑衣拜捧觴

二

愛日難忘盡子情一罇親黨慶歡榮雖云兩姓為姑舅
同是一家佳弟兄菜切青絲時雨滑魚披玉膾曉水清
不須絲竹並歌舞壽祝長庚歲歲明

獨坐

花柳橫陳兩月春山行盡日絕行人傳聞建業烏臺舊
見說姑蘇絳幘新學術何緣題閬苑詩書作計獻楓宸

春風滿目江湖濶無處乘槎問要津

清明

尊中無酒空對花上塚挂紙今誰家
舊火荒村已零落新煙破屋多咨嗟
晴風暖日笑桃李高田曠野悲桑麻
時節自好世俗惡荒阡古木啼烏鴉

七姑峯

七峯嵯峨翠模糊七峯之嶺隱麻姑
林深霧暗走麋鹿月落風起號於菟
塵世百年日變幻青山萬仞無榮枯

殘春細雨我熟睡門外烏雀從喧呼

山居書事

萬翠堆中結數楹出門漫作隴頭行侵衣山色宿醒解
撼屋溪聲曉夢驚文采照林禽異羽靈根醫病藥多名
老翁只道山居好旋摘金芽活火烹

題山中所有

石芥蘇麻紫蕨薇破頭巾冒山旄垂火流金鑠錦袄子
霜降木落玉面狸猪耳蕈供黃粟飯貓頭筍煮紅豆糜

泉聲鳥語和音樂
山翁樂處無人知

寓雲臺觀

琳宮遷建恰三年
時值艱危未了緣
白鶴不來華表幻
赤城欲去采鸞騫
擬招玄圃孤雲隱
且借仙家一榻眠
今夜山牕聽秋雨
松聲將夢上瑤天

夜聞機聲

鄰屋機聲斷復連
素絲深夜織婵娟
嚶嚶疑是冲霄鶴
咿吶渾如下水船
雙鳳絞梭拋玉筍
五花綾桁履金蓮

經天緯地男兒漢未必年來屬婦權

九日風雨作惡因記滿城風雨近重陽之句輒易

二字足成二章

雲低霧暗澹秋光籬落蕭條菊未黃元亮賞尊嫌滑滑
孟嘉岸幘惡浪浪百年難遇風光好九日仍愁節序荒
幕下參軍呼不起滿山風雨作重陽

二

霏霏霖霖潤林塘佳節令人暗感傷水溢難邀朱履客

雲深空望白衣郎香芽已帶十分紫
旨酒休孤半殼黃
敬帽龍山獨惆悵滿山風雨作重陽

雨牕偶成

雨壓中天雲霧低華陽郭外草萋萋
江湖夢遠紅塵隔
閭闔門高紫氣齊紅拂杏花沾翠帽
綠拖楊柳憶金閨
故人騰踏雲霄上何日相從信馬蹄

梨花

憑闌幾見物華新淑氣香催粉膩勻
淡淡園林千樹雪

溶溶庭院一枝春
仙肌綽約能超俗
玉骨玲瓏不染塵
休進西園諸子弟
如今佳調久無人

李花

老君指樹因為姓
太白相傳是一家
晴雨半春難見葉
暖風三月始開花
整冠憩客生疑似
鑽核乞人虛歎嗟
底事道傍多苦味
纍纍此去不須誇

杏花

羣芳一樣受春風
偏向枯枝點綴紅
種樹仙居雲氣裊
賣

花人在雨聲中無香蜂蝶何須聞有色容莊不在工遊
子尋芳莫輕折存仁方見積陰功

桃花

漫山羸俗軟輕堆雨露無私處處開道士曾移種仙館
漁翁相引到天台色隨歌扇輕翻覆紋織香羅巧剪裁
非是芳心貪結子祇因造化育胚胎

碧桃

移得仙家異種歸綠葩素質淡芳菲春風不結青枝子

暖雨曾沾紺色衣
皮子賦工花特異
玄都觀古樹應非
月明酒盡瓊枝落
疑是西園粉蝶飛

海棠

司花神女勒韶光
催放東家蜀海棠
艷冶半開紅粉面
嬌嬈軟襯碧羅裳
高高銀燭何煩照
淺淺金杯底用忙
孤負錦江千樹錦
少陵無語為花狂

睡遲

剪燭吟詩睡較遲
破牕漏月笑相窺
時聞蛙吹鳴荒坎

忽見鶴巢翻故枝花落水流鸞鏡晚夢回酒醒鳳簫吹
王功霸業皆塵土不博柯山一着碁

楊溪道中

春來頗覺無情思忽見野梅開樹花闌上紅頭仍有脚
道傍白髮久無家南國衣冠汙塵土中天樓觀絢雲霞
相逢猶說築城苦饑立東風生怨嗟

蜀水道中

迢遞春山春日遲老天無事使人悲時危漢苑花含笑

風急隋堤柳蹙眉村落無烟幾千里麥麻何處兩三岐
年來無限傷春意獨倚長松聽子規

次王和夫見寄韻

俯仰無慚一不驚寒香晚節頗關心九天雨露恩常溥
萬里山河恨未平老景肯輸詩筆健曠懷寧讓酒杯清
紛紛利祿爭先步誰似淵明去就輕

二

世事翻騰莫浪驚且將詩酒漫陶情不期富厚如元載

擬把窮通問子平
睡足蓬牕松雨落
醉歌陶枕竹風清
纍纍肘後黃金重
不博高談玉麈輕

月下白蓮詩會

廣寒宮對若耶溪
綺袂佳人照綠漪
萬里寶奩開玉鑒
三千粉面會瑤池
明光素魄凝香處
綽約仙姿弄影時
說與姮娥休負約
香山社裏久相期

復入大鄣

山頂飛泉綠樹齊
鸞鸞相見倦攀躋
龍眠溪洞涎流石

鹿過林皋麝脫臍日落空巖山鬼嘯風生古木野猿啼
兩經冠劫山中避歷徧人間萬險蹊

同弟士謙登覽鄆山之勝賦此

披榛拾磴事幽尋造化生成嵌碧岑丹灶無烟鉛汞冷
碁盤有石蘚苔深飛泉下注龍池淨香木空遺藥研沈
一片蒼頑具形器惜無珍賞蔽嵌崟

誕日

虛負光陰五十三遭時屯蹇却難堪潛藏形影秋前燕

零落繭絲春後蠶
林外孤鷺飛翺翺
寰間羣虎視眈眈
年來不見商霖手
祇恐諸公醉夢酣

雨牕偶成

門無車馬淨蒼苔
讀倦高眠午夢回
一鳥哀鳴衝雨去
兩僧諷誦蹋雲來
天橫黑氣心常恐
道隘紅塵眼倦開
安得祥風甘露降
長歌歌上鳳凰臺

對雨

茅屋經年長薜蘿
故人久雨不來過
山川慘慘光華少

天地昏昏煞氣多
階草宿螢藏細葉
庭梧巢鳳覆長柯
細看柱礎饒蒸潤
奈此雲雷未已何

吳琴道中有感

人生氣運有窮通
生遇明時命不逢
千里江山紛擾際
七年踪跡隱淪中
柳偏陽地先搖綠
桃恰春寒未放紅
遙憶故人江海上
飄零書劍各西東

吳琴忠烈廟

古祠摧敗獨孤村
老衲龍鍾倚廟門
半畝寒冰栖臘意

一川晴日借春溫
松林慘澹猿猱嘯
山徑崎嶇狼虎奔
說與行人慎回顧
歸時切莫近黃昏

度崩坑嶺

雨過郊原綠倍添
竹輿行處倦厭厭
翠垂松葉沾衣袖
紅綻花枝映帽簷
石澗水香麋麝過
林梢露重蜨蜂黏
軟晴天氣催農務
麥飯新嘗似蜜甜

雨牕述事

世事落落將奈何
四溟鼎沸紛天戈
青山過雨十分色

黃潦得風千丈波我方高枕北牕下君亦藏器東山阿
靜觀萬物待時動日華依舊高蹇我

過大石門

一溪流水漾晴沙行出孤村日未斜在世由來多是客
此身何必更尋家向人報喜枝頭鵲與衆爭嫌屋角鴉
眼底休論凶吉事且看田叟種桑麻

平郊晚眺

垂天陣陣壓山雨傍水汎汎獨木橋松徑縈紆少蹤跡

荆扉掩映無塵囂
燈明茅店客閣榻
路轉野寺僧歸巢
青帘高捲酒已罷
獨鶴歸晚聲寥寥

大雪

惻惻東風毳褐單
銀河剪水雨天垓
初疑金縷飛揚絮
却妬朱門賞牡丹
粧點春光琪樹老
迷漫曙色玉山寒
閉門欲學袁安臥
祇恐隣家笑冷官

雨中出北門

白雨茫茫山下溪
青秧匝匝水平堤
小姑洗足忙朝餉

老叟科頭趂早犁魚上釣來供客飲鶯飛樹立向人啼
處多歌斷交情見漫說當年百里奚

哭胡師中

大易推明先後天更將圖卦究微玄文從韓子經三變
學接文公第八傳只道斯文天未喪豈期後進淚潸然
淒淒旅櫬薰風道黯黯愁雲落日邊

平林煙雨

梗楠杞梓鬱修林沐雨磨烟紫翠深數縷早春籠秀挺

幾番清夜嚮蕭森橫枝覆地不見日直榦參天都是陰
材大從來難世用風雲氣節歲寒心

贈孔學教克煥

克煥乃宣聖之後其八世祖端朝常為黟縣尹遂家
於歙後遷邑之八都克煥有司以才行舉為儒官家
藏端朝誥勅猶存

聞說君家好山水至今猶是魯儒風春時練帶魚初上
霜後花屏葉更紅不是新安來孔氏如何闕里有文公

聖賢道統相傳妙自北而南意已通

余生六十有五伏覩先君靈鷲壁間詠不覺泣然
敬用嚴韻又為之恧然期於後者尚其然乎

罔極恩深仰昊天時思追遠薦寒泉出門宦海波濤險
借榻禪房風雨眠深夜談鋒夸咄咄平時講道覈玄玄
白頭追和先君韻倚柱沉吟涕泣然

戴氏樓居次韻

山環水繞居之安圖畫森列宜晚看翠幕低垂爽氣肅

銀燈高照書聲寒世情頗覺眼界窄酒量不博詩腸寬
湖海半生今白髮掀髯一笑倚朱闌

二

遙對東山憶謝安百年塵世靜中看時危寶匣神光吐
人阨金城煞氣寒傍舍田園欣有託過庭詩禮素來寬
等閒名利無心嚮白鳥飛飛人倚闌

避亂蘭坑題喻氏池亭

暇日閒登池上亭池荷斂雨散餘馨時迎秋近稻花白

水汎涼生蓮子青竹下杯盤休酩酊眼前兵甲願清寧
我來未了公家事老幼相逢涕淚零

題義堂

溪上種蘭堂扁義相傳喻姓起伊周子孫蕃衍皆純樸
池館荒涼付謬悠教子讀書忘請謁勸人耕稼絕干求
從來積善還餘慶多少收成在後頭

喻氏堂義可以為訓矣記之且賦之登斯堂者庶
其有興乎

秋日郊行

西風吹老萬年枝黃鶴飛來不肯棲鴈過楚天秋日薄
蟬鳴溪樹暮雲低儒衣誤我祿違養野興可人詩易題
怪雨乍收妖未息山中漫爾憶金閨

次戴仲庸有懷

多君氣突董宣強藉甚名聲四海揚北上燕臺宮闕壯
南窺禹穴海天長每思濟世人難濟翻笑狂夫老更狂
冷眼看渠翻覆勢冲霄孤鶴素昂昂

揚州

仙人已騎白鶴去倦客漫逐紅塵來人間又見梧葉落
觀裏無復瓊花開明月皆春罷歌舞王宮相府俱塵埃
江山如此豪華歇千古豈不令人哀

泥

九陌香塵濕不飛融融隨步襲荆扉玉驄行疾濺春雨
紫燕銜遲帶夕暉蚓竅吐淤黏屐齒鳳書封漬汚朝衣
夜來滿地沾飛絮指點行人石徑歸

蒼龍洞

擇勝尋幽度遠岑
雨晴快我一登臨
山腰白鹿銜花過
洞口蒼龍隱霧深
石室生春僧兀坐
冰簾掛曉客來吟
浮生閱世心如水
山鳥何煩說古今

失恃

凶年厄運禍非常
慈愛翻成失北堂
青鬢為官冷亦樂
白頭喪母痛何長
銘旌外閃兒孫哭
衰絰中涵肺腑傷
養老奉終成大事
山南窀穸北山莊

九日哭母見菊感而賦之

時序何曾改物華風塵極目遍天涯
歎東籬雨花難放
哭北堂親節不嘉
落落情懷猶遜世
蕭蕭門戶尚浮家
龍山勝事空追憶
酒熟比鄰懶去賒

失意

失意深潛懶入城
坐愁懷恨老時情
征鴻叫月帶秋色
落木隨風送雨聲
憂國赤心慚未報
思親白首歎無成
傷心莫問人間事
淚洒空山烟霧橫

涇川道中

青山雨後白雲生
雲氣參差樹草清
明月出山雲弄影
清風吹水樹含聲
人家屋角驚龍吠
官路橋頭去馬鳴
天地之間我亦客
還將老眼望昇平

訪戴仲奔

四年兩度過君家
一笑相看感鬢華
老去不堪光景薄
春來依舊物情嘉
團爐佳醞四五盞
傍舍早梅三兩花
世事浮雲易更變
石金巖上好烟霞

送內兄戴仲德入藏

百歲光陰只恁麼英雄能幾占山阿
尋龍難辨金精秘
歸鶴仍悲薺露歌七十送兄情惻怛一卮奠墓淚滂沱
男兒至此事方了後世賢愚奈若何

題萬山堂

虛皇閣外是黃山許躡浮丘日往還
廟食武安三國始
王封渙號累朝頒已知白鶴曾題柱休說青牛不度關
地縮山林近城市人遊蓬島出塵寰

二

萬山頂上數間屋竹樹雲烟鬱翠蒼鐘鼓樓頭飛日月
風雷壇上送宮商灘聲迎枕春雨足嵐氣入戶秋風長
得似仙翁無箇事蓬萊宮裏醉壺觴

贈真人張虛冲

家住蓬萊頂上山暫將形跡寄塵寰代傳西漢遺千祀
名列東華第一班寶劍光搖祛海怪朱文夜奏發神奸
拜章上與天人語曾把陰功動聖顏

二

漢家譜系久無傳惟有留侯世世仙
百代冠裳齊日月
千年龍虎衛山川
道尊玄教大宗主人仰
名山古洞天
朝罷虛皇近丹闕
翠雲裘惹御爐烟

寄旌德趙用章

再讀停雲憶故人
別來四見梓山春
功名不讓文章伯
寵辱多輸自在身
三徑我聞彭澤令
百年誰是葛天民
斯文如線真堪歎
好句毋煩寄我頻

題休寧陳氏聽泉樓

何人山下起高樓樓下泉聲繞故丘
滴滴鳴琴堪洗耳泠泠瀉石試凝眸
支筇獨立天將晚掩卷似聞風作秋
到海終當浴日月安知巖壑不同流

石鏡

一片寒光嵌碧巖天開地闢孕岷嶢
四時長照匪銅鑄萬古不磨容薜緋
絨拂試每驚鬚髮改摩挲疑有鬼神監
水奩不卷照幽寂萬壑清風舞翠杉

擬上御史

文星昨夜照江東
萬丈光芒上貫虹
赫赫世驚冠聳豸
行行人避馬乘驄
咨詢政在求民瘼
幽隱何緣達帝聰
歸覲清光應顧問
江山寥落困窮中

贈孔希文歸澗

我愧為儒事筆田
君來往顧辱佳篇
半生騰踏江湖日
孤館蕭條風雨天
青眼故人能有幾
白頭詞客更誰憐
江東遊遍浙西去
風撓蘆花月滿船

黃氏敦睦堂

風俗之薄久矣敦睦之風我獨見於克敬兄弟焉乃
為篆書其額贈之詩文

黃氏庭前棣萼新乳溪溪上樂天真水分兩派川源遠
花發連枝天地春風急雁行吹不斷波清魚隊見相親
紫荆樹色榮枯易笑殺田家俗未淳

仲修弟誕日

兩年誕日客山莊厭見諸孫奉壽觴百歲幾回同暢飲

半生多是負韶光
西池桃過千年熟
南極星迎一線長
富貴年逾頭漸白
青鸞何事背孤凰

代人作送歐陽知縣秩滿

金井蕭蕭落翠梧
郎官匹馬出長途
琴書小束盈車兩
稚耄追攀載酒壺
任滿不妨留一犢
身閒便合跨雙鳬
鳳城故舊青雲上
連茹而今定不孤

次孤岳上人韻

相逢偶似虎溪橋
借榻仙房春十朝
無補但思遼海去

投閒安用小山招吹噓暖雨披紅萼攬掇春風上翠條
塵世浮雲隨處變且容花鳥伴淒寥

題和心齋道友藥室

一室如舟久煉真青芝赤箭襟新陳松花釀酒昔留客
榭葉燒丹今養身藥籠出入成都市風符上下揚子津
三千童女鳴簫鳳吹出玄都樹樹春

寄黃克敬謫歸

力叩青都虎豹闕危言鯁直動天顏一生涕淚常憂國

萬里風塵已賜環，共惜賈生成遠謫。遙知唐介得生還，
馬蹄又踏歸來路。應笑奸諛鷺班。

郡庠鄉飲酒賦唐仲實

青衿濟濟集黌宮，玷爵升堂典則同。歷代相傳鄉飲酒，
清朝復繼古人風。衣冠禮樂從先進，齒序耆髦喜再逢。
立懦厲頑敦薄俗，斯文矜式藉羣公。

東白軒

晨光初動搏桑國，素色旋彌宇宙中。萬里氣浮天晃朗，

五更人訝月朦朧
遂令天下昏昏者
要與人間皎皎同
虛室縱生能幾許
酒酣欲問野航翁

送客偶作

滿目雲翻稻半黃
化工成就答秋光
漸看草木離披色
惟愛蓀蘭旖旎香
故國音書天渺渺
舊家松柏翠蒼蒼
偶因送客叢山道
又得田家棗栗嘗

中秋

年年古桂散清香
夜夜寒光照草堂
高樹依然飄馥郁

老蟾從此照淒涼
婆娑影動拂三島
徙倚花陰醉幾場
休笑南樓狂老子
昔年東府更踈狂

九日飲姪女家

菊花杯泛茱萸酒
楊柳村沿石境山
門掩黃雲千百頃
溪藏紅葉兩三灣
懽然自覺情難盡
醉矣都忘夜易闌
細雨斜風休作惡
歲寒心事正相關

高諸山

避地曾經遇虜俘
挈親攜弟費支吾
世將禍亂謀臣拙

天遣英雄大業圖江革行傭身畢備陳遺焦釜復充鋪
白頭又見昇平象朝夕齋鹽粥一盂

穀日乃先妣忌辰感而賦之

穀日行歌悲草堂追思鞠育感情傷園林無恙且故里
松楸却怪猶殊方慈訓入夢月皎皎羈懷滯雲此茫茫
百年但乞身强健一任滄海塵飛揚

寄施孟文兼東魏璋知府

聯鑣共話過山中輦嶺雲深阻往從風雨滿川題醉墨

乾坤隨處著行踪九霄沆瀣和雲嘖萬斛珠璣帶月春
二老風流合典則文星夜夜照芙蓉

過旌德下莊省先墓山長公墓因訪方朝陽

幽勝何年號隱龍光風霽月四時同族綿百世雲仍盛
秀萃一門山水雄古木修藤時雨露良田嘉穀自秋風
我來苒苒歲云暮恍若桃源邂逅逢

同仲修士謙弟山莊夜話

煮茶燒栗共清談開酒尋蔬樂且耽產業多年存嶺北

兒孫百世享江南軒昂昔比冲霄鶴退縮今如上箔蠶
廊廟棄才猶犬彘由來榮寵底須貪

仲仁見邀雲臺小酌席間次韻

風偃花枝亞石闌春餘情緒頗相關蹉跎雙鬢千莖白
孤負中心一寸丹對景忘懷聊酹酌感時憂國暗辛酸
狂蜂痴蝶從撩亂輸與幽人冷眼看

晚晴復雨

三更雨後天開霽一霎晴蒸雲作堆茅屋似緣留我住

柴門肯許俗人來
池塘夢斷無新句
隣舍情多出舊醅
明日陰晴猶未定
南山殷殷忽聞雷

寄京口俞判府用中

年八十
九歲

白髮紅顏照綠尊
黃花青蕊映朱門
城中人慶百歲壽
堂上翁攜五世孫
理性發明周孔學
文章超邁馬班言
四方學者如星布
咸仰先生道義源

暮秋即景

天氣將寒即漸加
東籬猶有傲霜花
羣漚汎汎下芳渚

孤鶩飛飛送落霞
山僻樹高巢鸛鶴
江晴水落網魚蝦
城頭夜月泣嫠婦
征戍何時得到家

仲修士謙二弟亦感冒作此以代問安

命乖兄有負薪憂
二弟風寒日減不手足
親情思彼此星辰
度數有遲留干戈邊
鄙軍師苦風雪山川
薪米愁枕上脊令詩
再讀何時樽酒共春遊

二弟和韻復韻之

白首長年為國憂
時人曾悟此心不世情
惡薄共誰語

春事開殘不我留
栗里莊前陶令醉
浣花溪上杜陵愁
有錢難買身強健
載酒尋芳作勝遊

寄郡幕李叔易兼東靳寬甫知事

半紙虛名鮎上竿
每嗟孤負寸心丹
濟時有術補天易
學道無緣縮地難
酒熟牀頭巾可漉
魚縣門外缺空彈
榮枯遲疾皆由命
白首當年起釣磻

次汪仁齋百丈巖韻

斷壁懸厓獨木橋
雲林烟樹影蕭蕭
巔嶁上聳參天石

噴噴中翻巨海濤冥晦疑從三峽度崢嶸真絕衆山高
我來避地非登覽怕煞征塵染布袍

過平墓

飛泉百尺噴龍門界破青山玉一痕萬壑松聲清病骨
半川花影惱詩魂茶爐藥鼎封雲窟棋局盤池隱木根
從古名山多勝景何妨載酒共談論

小疾

日抱微疴費誦吟等閒風月不關心病魔便合避三舍

詩價何曾直百金
泉石烟霞從性癖
市朝塵土任渠深
祇今四海瘡痍甚
安得秦人為砭鍼

詩謝朱克用萬戶

崇天京都門名

驕馬京城記昔年
侯曾侍輦出崇天
御街寬處春容澹
金殿橫頭日影穿
側帽玉孫歌窈窕
隔花仙子話因緣
歸來江右紅塵際
天上風雲只自然

懷姑熟

蘆葦蕭蕭青山巔
故人悠悠別經年
李家兄弟擢雙桂

張氏門庭出孝蓮右轄簪纓今有幾監司冠蓋豈無傳
感慨翻思成一夢令人却憶錦袍仙

李青山二子長伯羽次曰仲羽皆中鄉貢其里名雙
桂坊長孝後知閩憲幕完顏右丞呼納監司皆寓居
城中

和曹志行寄弟可菴

幾年無計見長眉春半詩來惱我脾
邀世入山深始好憂時撫劍醉方宜
不聞彭澤人栽竹翻笑商巖老却芝

情話雖親悵疎闊寄書仍怪鶴歸遲

次王和夫見寄

旌旗搖曳柳營前
邑賴元戎守禦堅
林藪漫如秦地日
山河依舊漢家天
剛風萬里掃妖祲
甘雨四方清瘴烟
堪羨山中萃清致
醉歌人訝老詩仙

和俞舜欽韻

康衢陋巷乏紅塵
湖海交情孰與親
旭日依然升海島
妖風久矣渡江濱
市橋細柳惱清曉
官路孤梅愁早春

甚喜地仙俞博士知幾自不與時均

聞關上日戰

邊關虎狼日格鬪村落雞犬皆哀鳴壯士奔騰巢進取
老夫懶拙期昇平九天星象乖異見千里關山魂夢驚
起舞中宵誰氏子好將時事為予評

飲程氏莊

小閣紅爐暖似春白甕瓶矮瀉香醇平時恬退非無益
此日英雄恐未真虎陣從教分地界鵲聲未必叶天津

夜來醉裏憑高望萬里紅雲覆紫宸

有客自北固來者留宿茅齋

湖海交遊老弟兄十年不見困從征
干戈江上猶思鬪
詩酒燈前且叙情
世事看來棋局變
功名識破釣絲輕
到家風月知無恙
相見諸公頗寄聲

金陵懷古

六代繁華古又今
鍾山王氣拂雲岑
玉驄聲斷烏臺寂
赤幟陰移畫省深
月照觚稜風淅淅
霜清角道夜沉沉

白頭原是觀光客手弄梅花感慨吟

贈宣城朱士元善吹簫

玉樓明月紫鸞管秦女曾吹引鳳凰一氣抑揚調律呂
五音清濁按宮商嗚嗚如隔落花遠嫋嫋更聞流水長
鄭衛淫聲悅凡俗吾將洗耳聽朱郎

雨中呈豐彥輝

十年塞北干戈擾二月江南雪雨深時異世情難逆料
天寒老客不能禁江山明秀動歸興花柳橫陳驚壯心

休上賈生流涕策且賡梁父白頭吟

寓居牕外葵花盛開可愛

牕外花開一丈紅數枝穠淡倚牆東寸心也學傾朝日
二色相依競晚風猶記昔年栽館地又看佳節走兒童
蒲葵在眼龍舟歇不道飄零尚梗蓬

高村吳仲文有約

共道延陵好弟昆嚮來簪笏謁高門故家喬木今非昔
流水孤村朝復昏松塢樹交猿抱子花園草合鶴生孫

繁華自古如春夢相對悲歌酒一尊

春雨彌旬下民艱食即事

白雨跳珠瀉嬾荷墨雲堆騎轉庭柯牡丹花好醉能幾
杜宇聲悲春不多樂事每為塵俗誤韶光也被老天磨
惜春歸去留無計買酒溪頭長短歌

縣丞邢彥權考績賦詩贈行

春風驛路馬蹄輕載酒河橋酌遠行官向滿時知政績
人於別處見交情十年帶劍裨王業二月看花上帝京

聞道青雲多故舊長才祇合輔台衡

次韻葉實夫西山園飲

西山蒼翠誰家園竹樹遶屋何森然置酒邀我坐林下
高歌握手行花前偶然得句不在巧相勸爛醉仍烹鮮
世事人情多莫問百年過去知誰賢

次宋耕夫經陞梅木杖韻

羅浮山下碧柯長入手摩挲色古蒼顛躋暫添身畔力
策扶曾嗅水邊香狂吟每喜對雪月倚立更憶傳青黃

金夕已五
止渴將軍不攜去留與詩翁訪草堂

南山秋色樓

秋色橫空眼界寬玲瓏八面見峯巒
稻花香滿雨初足
梧葉聲清風正寒
百尺不教餘子臥
四時那許俗人看
課孫教子無他事
笑拍闌干解醉顏

宿蜀川覺乘寺

遊宿招提記去年重來春暮雨餘天
豐碑甚愧留名姓
玩世何由脫俗緣
未了此身還是累
已參前定不為禪

春花秋月無窮意一笑空山聽杜鵑

貞素齋集卷七